

**■ GLOSSA**

# Nua è la funtauna dal Rain propi? Qua!

DA SILVIO CAMENISCH

Nus propi indigens savain bain nua ch'ella è propi, la funtauna dal Rain, duvrain nus garantì segir betg studegiads e las medias. Qua, tranter quellas duas coissas da culms siaden e viaden è ella anc adina stada, la funtauna. Quantas giadas essan nus vegnids tranter quellas duas coissas da culms siaden e viaden ed er stads in'urella a guardar u spievlar enturn la creaziun divina. Quella è divina, u betg Ludivina, di ti a quels trais giadas sabiuts da las universitads e las medias.

Tantas giadas avain nus chantà, na, meglier urà si qua en schanuglias sco quai che nus avain emprendì «Fontaunas clar resunan», ed igl è vairamain squittà siador nauador anc pliras funtaunas. Il siemi blau ha lieu si qua mintga giada al lieu, vor Ort, sa quai il nudader supremurà Bromeis e las medias? Super. Las giuvnas legras auas sa sparunan da qua giu en carré, o Dieu co quellas sa sparunan ch'ins vegn tut sturn, fan ils ciclists subit suenter cun lur downhill bikes! Da las auas avain nus emprendì, da las auas! Als turisticers sai er esser endretg, quels fruschan ils mauns ed il rest en las auas.

Da quai n'avessan nus mai semià, in siemi da Nadal n'èsi betg gist, sa dumonda ussa l'entira naziun. Nua è la funtauna dal Rain propi? Ils benedictins da claustra medievale en l'Apennin da la Surselva catolica part



sura («Il num da la rosa») n'avess mai dastgà prender giu quella lavur da matura, quella betg! Quella metta en dumonda la funtauna, mussa autras funtaunas istoricas! Arroganza incredibile, n'èn autras funtaunas istoricas betg documentadas istoricamain, be geograficamain. Ils istorichers, geografs u tgenins n'èn betg Dieu, n'èn betg dieus, u tuttina?, lura prendai putgà da mai.

Nus savessan er auter, savessan manar la cursa dal Rain, vus sportists schais il trassé, er egal, cun anzas supplementaras enturn ils culms e las vals e qua tras schlunganar il traject per insaquants meters. Nus avessan er tut auter, savessan la fin finala ed anala er prolungar cun pumpa da vacuum per insaquants centimeters, la tecnologia auta, jau manegel la hightech da cun vacuumar prolungar i lubescha senz'auter, betg senz'auter ma senz'auter. Nus cartain vidlonder, senz'auter, ils perids e plugls vidlonder na crain betg senz'auter; betg noss problem.

Nus vesain schon ch'il maturand (davos el ses bab e trainer mental!) di la vardad, nus na cartain betg, anc sche nus vesain, essan nus vegnids tratgs si sco nagliur uschia da crair quai che nus na vesain betg; uschia insatge furma. In bratsch tanscha effectiv pli lunsch tranter quellas duas coissas mesaunas siaden e viaden, nus cartein tuttina betg! Mintgatant na sa in bratsch er betg uschia tge che l'auter bratsch fa, tanscha in bratsch uschè lunsch siaden e viaden ch'el gnanc dastgass, è gea uschia! Quai mesirain nus or sezs quella giada, senza las medias. Nus dain, nus clamain lura tar ina conferenza da medias Spezial!

Tut en urden. Il status quo è puspè salvà, puspè cementà. La funtauna dal Rain e propi nua ch'ella ha dad esser, avain nus ditg da bell'entschatta. Stuain betg ruchegiar culms, anzi, uschè ditg che stantan culms e vals e la ligia grischa è la propi funtauna dal Rain e tgina sin noss terratsch, quel è sontg! Nus lain la paisch, nus dain la paisch, dattan noss pirs adversaris uschioglio er betg!, patratgar savain nus adina tge che nus lain. Il meglier fundain nus ussa la Pro Fontauna dal propi Rein (PFdpR) stretg regiunala, creain in nov parc Fontauna dal propi Rein, nossa finamira è in label da patrimoni mundial a semper, pir lura dain, pir lur avain nus la propi paisch. Nus essan uschia.